

Diese Propheceyung in Hochteutscher versetzt/  
gleicher gestalt zu Hamburg gedrucket/ lautet also:

Propheceyung / die der Hochgelahrte Doctor Pomera-  
nus, Pfarrherr zu Wittenberg mit sich von Lübeck gebracht/ so  
er in einer alten Bibel gefunden hat / des Dienstages nach  
Canare, Im 1532. Jahr.

Als man zehlte 1322. ist zu Erffurt propheceyert worden / durch  
einen ehrbaren Mann mit namen Albertus a Westen.

**W**enn man zehlen wird (1. a) 1628. (2. b) wird sich erhe-  
ben ein groß mechtig ding / (3. c) in diese Lande / (4. d)  
das wird krafft vnd gewalt von sich selber über alle  
dinge haben / (5. e) vnd wird so starck seyn / das es kei-  
ne gewalt leiden mag / (6. f) dann er ist vnd wird über alle gewalt  
seyn / (7. g) vnd welcher ihm wil mit gewalt entgegen handeln / der  
sehe sich für / (8. h) Er wird gewalt leiden / (9. i) alsdann zu densel-  
bigen zeiten wird ein kindischer Keyser seyn / (10. k) vnd eine leicht-  
fertige Obrigkeit / (11. l) von Geistlichen / (12. m) vnd Weltlichen /  
(13. n) zum ersten von wegen der geistlichen in diesen landen / (14. o)  
wird er / (das ist der Keyser) seyn wider diese gewalt. (15. p) Aber  
dieselbige gewalt darff wol den Keyser vmb sein Keyserthum brin-  
gen / (16. q) vnd zu derselbigen Zeit wird einer daher blicken (oder  
herfür leuchten) (17. r) der führet eine Krone in seinem Schilde /  
[18. s] Gott weiß wol / wer er ist / [19. t] vnd der starcke von sich sel-  
ber wird sich finden vnter denselbigen Fürsten / [20. u] vnd die star-  
cke gewalt von sich selber wird wohnen in den alten Keyserstädten /  
[21. x] vnd dieselbigen werden noth leiden / [22. y] von derselbigen  
starcken gewalt wegen / [23. z] aber derselbigen städte gewalt wird  
gewinnen (oder überwinden /) von wegen der starcken gewalt von  
sich selber.

#### Abheilung des Textes.

Vnnd die weiltäuffigkeit zu vermeiden / hab ich den Text dieser Prophe-  
ceyung mit lateinischen zahlen vnd buchstaben vnterzeichnet / so viel nun zah-  
len / vnd buchstaben auß dem lateinischen Alphabet vorhanden seyn / in so  
viel Capitel wollen wir diese erklerung abheilen vnd ordenlich handeln

Der